

Յիշեալ լայնանիստ լեռան գագաթը մի կողմից նայում է դեպի Վանայ ծովը, միւս կողմից՝ դեպի Ռշտունեաց աշխարհը: Այդ գագաթի վրայ բարձրացաւ ս. Յակոբ Մծբնայ հայրապետը, այն աղետաւոր անցքից յետոյ, երբ խստասիրտ Մանաճիհը նրա սարկաւազներին ածեց ծովի մէջ: Վշտացած հայրապետը լեռան բարձրութիւնից նայեց նախ դեպի ծովը, որ կլանել էր նրա սարկաւազներին, եւ ապա դեպի Ռշտունեաց աշխարհը, որ այնքան անգութ գտնուեցաւ դեպի նրա սանիկները: Նա անիծեց թէ ծովը եւ թէ աշխարհը... Ծովը կատաղեց, գռռաց, փրփրեց եւ իր փերից իսկոյն դուրս վազեց: Շէն ու շինութիւն, արտ ու անդաստան, բոլորը կորան, ջրասոյճ եղան: Երկինքը պղնձացաւ, անձրեւ չտուեց, երկիրը ամլացաւ էլ ջուր չբխեց: Ծառն ու ծաղիկը, խոտն ու բուսը, ճախն ու ճարակը, անխոնջ մշակի վարն ու վաստակը, բոլորը երաշտից այրուեց, ցամաքեց: Նրանից յետոյ սովը մէջ մտաւ եւ իր ետեւից ժանտախտը բերաւ: Անգութ հնձաւորը հնձեց, տապալեց եւ դիակներով երկիրը ծածկեց: Գայլն ու բորենին, անգղն ու արծօին ազատ, աներկիր, թափառում էին մի գիւղից միւս գիւղ եւ լափում էին անթաղ դիակներ...

Արտամեղի անպատկառ աղջիկներին անիծելուց յետոյ ս. Յակոբ հայրապետը՝ այդ երկրորդ սարսափելի անեծքն էր, որ կատարեց Ռշտունեաց աշխարհում: Յետոյ նա անիծեց Փշաւասս գիւղը, ուր մինչեւ այսօր փուշից աւելի ոչինչ չէ բուսնում... Բայց ժողովուրդը, ներողամիտ ժողովուրդը, այդ անիծասեր հայրապետի յիշատակը յաւերժացնելու համար նոյն Կապուտկող լեռան կապտագոյն կողքի վրայ, նրա անունով հիմնեց մի վանք, որ մինչեւ այսօր պաշտում է ամենայն ջերմեանդութեամբ: Մենք անցանք այդ վանքի մօտից, բայց նրա մէջը չմտանք:

Ակսեալ Նոր-գիւղ կոչուած ավանից, որը այժմեան Գաւաշ գաւառակի գայմագամանիստ գիւղաքաղաքն է, մինչեւ Դատոանի Նաւահանգիստը հասնելը, ծովի եզերքով սփռուած են զանազան ամայի եւ շէն վանքեր, որոնք իրանց ծովահայեաց դիրքով սքանչելի տեսարաններ են ներկայացնում: Ամենագեղեցիկ տեղերը լեռների բարձրաւանդակների վրայ՝ ընտրել են վանքերի համար: Ես կը յիշեմ այդ վանքերի անունները միայն. Կարմրուկ սուրբ Աստուածածին, Գագիկ թագաւորից շինուած, որը միաժամանակ երեք հարիւր միաբան ուներ, իսկ այժմ համարեա ամայի է. Լուսապտուղ սուրբ Սահակ, Գանձակ գիւղի մօտ, որը ամէն աչացաւ ունեցողների բժշկողն է. Ս. Թոմայի վանք, որը գտնուում է Կապուտ-կող լեռան ծովահայեաց բարձրութեան վրայ եւ պահում է իր մէջ Թովմայ առաքեալի ահեակ բազուկը. Ս. Գեւորգայ վանք, Գոմս գիւղի մօտ, որի մէջ պահուում է ս. Գեւորգայ գլուխը, Ս.